



## JUDICIAL SYSTEM MONITORING PROGRAMME

### PROGRAMA DE MONITORIZAÇÃO DO SISTEMA JUDICIAL

#### *Komunikadu Imprensa*

**Periodu : Setembru 2011**

**Edisaun : 23 Setembru 2011**

#### **Tribunál Distritál Baucau kontinua adia julgamentu iha loron partikular balun**

Durante monitorizasaun JSMP iha Tribunál Distritál Baucau hahú husi Fulan Jullu nia klaran to'ó iha Fulan Setembru 2011, JSMP deskobre katak iha kada loron Segunda, iha sesaun dader sempre la halo julgamentu ba kazu balun ne'ebé tama ona iha agenda. Bai-bain sesaun dader ne'e adia fali ba loron seluk ka dala – ruma kazu balun julga iha sesaun lokraik.

Tuir rezultadu monitorizasaun JSMP nian nota katak fallansu hirak ne'e mósu tanbá akomodasaun ka rezidénsia ba juizes sira la preinxe nesesidade réal loloos. Ho fraze seluk atu dehan katak rezidénsia ba juizes sira la suficiente atu akomoda número juizes ne'ebé servisu iha jurisdisaun ne'ebá. Atualmente, Tribunál Distritál Baucau iha juizes nain 4, kompostu husi Juizes Nasionál nain 3 no Juiz Internasionál nain 1. Mesmu nune'é, rezidénsia ba juizes sira só disponível deit ba ema 2, ho kondisaun ne'ebé mak la favorável hanesan la iha kuartu ne'ebé natoon atu akomoda juizes sira atu hela.

Direitór ezekutivu JSMP Luis de Oliveira Sampaio haktuir katak *mesmu kumpriende katak Governu infrenta dezafiu oi-oin no hatuur prioridade política dezemvolimentu nasionál tuir política no planu anual Estadu nian, maibé JSMP enkoraza Governu atu kria kondisaun ne'ebé diak no konfortável ba autór judisiáriu hotu atu nune'é autór judisiáriu sira bele hala'ó knaar ho diak no kumpri sira nia obrigasaun tuir lei haruka.*

Relasiona ho situasaun ne'e, JSMP deskobre katak juizes balun tenki aluga Otél ka aranja rasik hela fatin ho sira nia osan rasik<sup>1</sup>. Maski JSMP apresia tebes ho komitmentu juizes hirak ne'e maibé JSMP mós preokupa katak situasaun ne'e la justu no situasaun ida ne'e grave teb-tebes tanbá bele impede juiz sira atu halo servisu ho diak no kumpri sira nia obrigasaun. Kuandu

---

<sup>1</sup> Informasaun refere JSMP hetan husi fontes konfirmadu ne'ebé la kohi atu temi sai nia naran ba públiku iha Tribunál Distritál Baucau.

situasaun ne'e mak sei kontinua eziste, JSMP preokupa katak juiz sira bele abandona sira nia servisu tanbá la iha kondisaun ne'ebé favoravél no seguru ba sira atu hala'ó sira nia knaar.

Tuir informasaun ne'ebé JSMP rekolla, situasaun ne'e rezulta no prejudika teb-tebes sira ne'ebé kumpri notifikasaun tribunál atu marka prezensa iha tribunál hodi tuir julgamentu ba sira nia kazu ruma. Purzemplu, parte intresadu sira husi Distritu Lospalos, lamenta teb-tebes tanbá sira lakon sira nia osan ba transporte no tempu ho distânsia ne'ebé dook, maibé infelizmente julgamentu la iha, tanbá juiz la iha fatin ka atraza tama servisu.

JSMP hein katak, Governu persiza fó atensaun ba situasaun ne'e, atu nune'é bele buka solusaun provizóriu ka solusaun alternativu ba situasaun ne'ebé juizes sira infrenta hanesan iha Tribunál Distritál Baucau, nune'é bele evita implikasaun direta ba interese partes sira nia.

Atu hatene informasaun Kle'an favor kontaktu direktamente:

. Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883